

Namminersorlutik suliffeqarfiutillit immiaaqqanik, viinninik imigassallu kimittuunik eqqussisinnaangornissaat anguniarlugu Nioqqutissanik eqqussuineq annissuinerlu pillugit Inatsisartut inatsisaat nr. 18, 30. oktober 1992-imeersumut Naalakkersuisut allannguutissatut siunnersuuteqarnissaanik peqquneqassasut Inatsisartut aalajangiiffigisassaattut siunnersuut

Inatsisartunut ilaasortamit Jens-Frederik Nielsenimit, Demokraatit, saqqummiunneqartoq

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneernejarnan

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Hans Peter Poulsen, Siumut, siulittaasoq

Inatsisartunut ilaasortaq Jens Frederik Nielsen, Demokraatit, siulittaasup tullia

Inatsisartunut ilaasortaq Asii Chemnitz Narup, Inuit Ataqtigiit

Inatsisartunut ilaasortaq Mariia Simonsen, Inuit Ataqtigiit

Inatsisartunut ilaasortaq Kuno Fencker, Siumut

Inatsisartunut ilaasortaq Lars Poulsen, Siumut

Inatsisartunut ilaasortaq Jens Napaattooq, Naleraq

UKA 2022-mi ulloq 10. oktober 2022 siullermeerinninnerup kingorna ataatsimiititaliap sunnersuut misissorpaa.

1. Siunnersuutip imarisaa siunertaalu

Innuttaasut immiaaqqanik, viinninik imigassanillu kimittuunik nammineq atugassaminnik eqqussisinnaangornissaannut aalajangiiffigisassatut siunnersuut una tunngavoq. Innuttaasut immiaaqqanik, viinninik imigassanillu kimittuunik tunisassiortumit toqqaannartumik pisillutik nioqqutissanik taakkuninnga Kalaallit Nunaanni najukkaminnut pajunneqarsinnaasariaqartut siunnersuuteqartup ilaatigut innersuussutigaa, tamannalu ullumikkut inerteqqutaavoq. Imigas-sanik aalakoornartortalinnik akikinnerusunik innuttaasut pisisinnaalernissaat siunnersuutikkut siunertarineqanngilaq, akerlianilli siunertarineqarluni nioqqutissat pisarineqarsinnaasut

amerlineqarnissaat. Taamaattumillu pisinermtu atattillugu eqqussuinermit akitsuutinik, assartuinermtu assigisaannullu akiliuteqartoqartarnerata ingerlaannarnissaa siunnersuuteqartup akuersaarpa, tamatumani aamma siunertarineqarluni nunatsinni peqqinnissamut imigassamullu tunngatillugu anguniakkat aallartisarneqarsimasut ataqqineqarnissaat.

2. Siunnersuutip Inatsisartunit siullermeerneqarnera

Siunnersuut siullermeerneqarmat partiinit tamanit taperserneqarpoq, tamatumani piumasarineqarluni ilaatigut immiaaqqat, viinnit imigassallu kimittuut nammineq eqqussat akiisa apparnerisigut siunnersuutip peqqinnissamut imigassamullu tunngatillugu anguniakkanik ingerlatsinermtu ajoqutaalinnginnissaa.

Kiisalu taasissutissap kalaallisuuata danskisuuatalu akornanni naapertuutinngitsoqarnera eqqumaffigeqquneqarpoq. Kalaallisuuani allassimavoq; 'namminersorlutik suliffeqarfiutillit', danskisuuani allassimalluni 'private'. Taamaattumillu allannguutissatut siunnersuummik imaatumik Naalakkersuisut saqqummiussippu, tassani erseqqissarneqarluni siunnersuummi pineqartut tassaasut innuttaasut:

“Innuttaasut immiaaqqanik, viinninik imigassallu kimittuunik eqqussisinnaannornissaat anguniarlugu Nioqqutissanik eqqussuineq annissuinerlu pillugit Inatsisartut inatsisaat nr. 18, 30. oktober 1992-imeersumut Naalakkersuisut allannguutissatut siunnersuuteqarnissaannik peqquneqassasut Inatsisartut aalajangiiffigisassaattut siunnersuut.”

Erseqqissaaneq siunnersuuteqartup qujassutigaa allannguutissatullu siunnersuutip oqaasertai taperserlugit.

3. Immikkoortumut pineqartumut inatsisissatut siunnersuummik suliaqarnerup aallartinneqareersimanerani Aningaasaqarnermut Naligiissitaanermullu Naalakkersuisup ilisimatitsinera.

Allakkat 3. april 2023-meersut Aningaasaqarnermut Naligiissitaanermullu Naalakkersuisumit ilisimatitsissutaasut ataatsimiititaliamit tiguneqarput (ilanngussaq 1). Taakkunani paasissutissiissutigineqarpoq inatsisissatut siunnersuummik, isumaliutinu siunnersuutip matumani pineqartup siullermeerneqarnerani saqqummiunneqartunut malitseqartitsisumik, suliaqarneq Naalakkersuisunit aallartinneqareersimasoq. Inatsimmut allannguutissap 2023-mi ukiakkut ataatsimiinnermi saqqummiunneqarnissaa siunertaasoq Naalakkersuisunit paasissutissiissutigineqarpoq. Inatsisissatut siunnersuutaasussaq assigiimmik ineriartorfioqqullugu ataatsimiititaliap utimut nalunaaruteqarnissaa allakkamini Aningaasaqarnermut Naligiissitaanermullu Naalakkersuisup qinnutigaa. Naalakkersuisut ilisimatitsissutaanut tunngatillugu ataatsimiititaliap isummersuutai isumaliutissiissutip matuma kapitaliani tullermi allassimappu.

4. Ataatsimiititaliap siunnersuummik sularinninnera

Innuttaasut nammineq atugassaminnik immiaaqqanik, viinninik imigassanillu kimittuunik tikisitsinissaminnut periarfissaqalernissaat partiit akornanni akuersaarneqartoq ataatsimiititaliamit maluginiarneqarpoq. erseqqissarneqassaarli imigassamik atuinerup annikillisinneqarnissaanut suliniutinut aallartinneqarsimasunut akornusiinissaq siunnersuutikkut siunertarineqanngimmat.

Iliuutsit taakku ilaattut taaneqarsinnaavoq imigassamik atuneq annikillisarniarlugu imigassamik eqqussuinermi akitsuutit 2019-imi 10%-imik qaffanneqarnerat. Akitsuutit taakku imigassap procentia aallaavigalugu aalajangersarneqarnikummata, soorunami naatsorsuutigineqarpoq taakku innuttaasunut immiaaqqanik, viinninik imigassanillu kimittuunik eqqussineranni aamma atuutissasut.

Siunnersuuteqartup siunnersuuteqarnermini siunertaa pingaarneq tassaavoq nunatsinni niuertarfinni pisarineqarsinnaasunit allaanerusunik innuttaasut pisinissaminnut periarfissaqar-nissaat. Siunnersuut inersuarmi partiinit tamanit taperserneqartoq ataatsimiititaliamit maluginiarneqarpoq. Tamatumalu peqatigisaanik isumaqartoqarpoq imigassamut peqqinnissamullu tunngatillugu anguniakkanik ingerlatiinnarneqartariaqartut.

Kiisalu innuttaasut imigassamik akikitsumik pisisinnaalernerisa imigassamik atuinerup anner-tuseriarneranik nassataqarsinnaanera Naalackersuisunit isumakuluutigineqartoq ataatsimiititaliamit maluginiarneqarpoq. Taamatulli isumakuluuteqarnermut tunngavilersuutitik tigussaa-sunik Naalackersuisut saqqummiussinngillat. Kiisalu atuinerup qanoq annertutigisumik annertuseriarneranik siunnersuut nassataqartussat Naalackersuisunit naatsorsuutigineqar-nersoq pillugu Naalackersuisut paasissutissanik saqqummiussinngillat. Tamannali innuttaasut immiaaqqanik, viinninik imigassanillu kimittuunik nammineq eqqussuinaanni ilassutitut akitsuusiinissap isumaliutigineqarnissaanik Naalackersuisut mattussinngillat. Tamannali pillu-gu Naalackersuisut isumaliutaat inersuarmi partiinit taama annertutigisumik taperserneqan-gilaq. Ilassutitut akitsuusiinikkut niuertut akigititaat illersorneqassasut, taamaalillunilu aamma innuttaasut namminneq eqqussuinerisigut unammillerneqarnissamut illersorneqassasut, iner-suarmi nalinginnaasumik isumaqartoqarpoq. Akit qaffaseqqullugit ilassutitut akitsuusiinissaq ilaasa tapersersorpaat, allalli akerliusut, tassa isumaqartoqarluni akitsuut niuertut iluanaa-rutissaannut illersuutitut taamaallaat atuutissasoq. Naalackersuisut isumaliutaat pillugit taama assigiinngitsunik isumaqarneq sukumiisumik piareersaateqaqqaarani paasissutissanillu tun-ngaveqarani taama iliuuseqarnissap piviusunngortinneqarnissaanik apeqqusiinissamut tunnga-vissiiisoq ataatsimiititaliaq isumaqarpoq. Ajornartorsiut Naalackersuisunit qaqinneqartoq ataatsimiititaliamit maannakkut isummerfigineqarsinnaanngilaq, tassa aalajangiiffigisassatut siunnersuummi matumani sammineqartumut ilaangimmat. Tamatuma peqatigisaanik oqaloqatigiinnissaq, itisiliisoqarnissaa imaluunniit paasissutissiisoqarnissaa ataatsimiititaliap tungaanit kissaatigineqassappat Aningaasaqarnermut Naligiissitaanermullu Naalackersuisup ataatsimiititaliamut ikiunnissaminut piareersimanera ataatsimiititaliamit pitsaasutut isigineqarpoq. Kiisalu inatsisissatut siunnersuut Naalackersuisut saqqummiutilersaagaat saqqummiunneqareerpat, taamaalillunilu tigussaasumik ataatsimiititaliaq

isummerfigisassaqaqalerpat, ataatsimiititaliap Naalakkersuisullu akornanni suleqatigiinnerup taamaattup aatsaat pinissaa naapertuunnerpaatut ataatsimiititaliamit isigineqarpoq.

Kiisalu imigassamik atuinerup annertuseriarnissaanik pinngitsoortitsinissamut periarfissat allat peqatigisaanik misissorpeqartariaqartut ataatsimiititaliap isumaqarpoq.

Siunnersuummik suliarinninnermini ataatsimiititaliap isumaqatigiissutigaa siunnersuut matu-
mani pineqartoq nunamut tamarmut atuutissasoq aammalu nunatta avannaani tunuanilu utertit-
sisarnermut atuuttumut sunniuteqassanngitsoq naatsorsuutigineqartoq, tamatumani immiaaqqat
imeruersaatillu kulsyrimik akullit taamaallaat tuniniarneqarlutillu sassaalliutigineqaqqusaapput
ataasiarluni atorneqarsinnaasunik pooqartillugit utertitsisarnermi Naalakkersuisut akuerisaanni
ilaatinneqarsinnaasunik.

5. Siunnersuutip aningaasaqarnikkut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip
piviusunngortinnerani aningaasaqarnikkut allaffissornikkullu kingunerisassat siunnersuutip
tunngavilersuutaani aallaaserineqassasut.

Tamanna naapertorlugu siunnersuutip piviusunngortinnerani aningaasatigut kingunerisassat
siunnersuummi nalunaarneqartut ataatsimiititaliamit maluginiarneqarpoq, taamaalillunilu inat-
sisip nalunaarutillu allanngortinneqarneranni allaffissornikkut aningaasartuuteqarnissaq naat-
sorsuutigineqarsinnaalluni. Taakku 500.000 kronit sinnernissaat naatsorsuutigineqanngilaq.

Tamatuma saniatigut siunnersuutip akuersissutigineqarnera suliffeqarfiit immiaaqqanik,
viinninik imigassanillu kimittuunik tuniniaasut kaaviiartitaasa ikileriarnernannik nassataqar-
sinnaasoq siunnersuuteqartumit paasissutissiissutigineqarpoq, tassa innutaasut nioqqutissanik
taakkuninnga nunanit allanit namminneq piserusussappata.

6. Ataatsimiititaliap inassuteqaatai

Naalakkersuisut allannguutissatut siunnersuutaat siuliani allassimasoq ataatsimiititaliamit
taparserneqarpoq. Ataatsimiititaliamilli maluginiarneqarpoq Naalakkersuisut allannguutissatut
siunnersuutaanni oqaasertat kukkuneqartut.

Tamanna tunngavigalugu ataatsimiititaliap isumaqatigiittoq ima **allannguutissatut siunner-
suuteqarpoq:**

**Innuttaasut immiaaqqanik, viinninik imigassanillu kimittuunik eqqussisinnaanngor-
nissaat anguniarlugu nioqqutissanik eqqussuineq annissuinerlu pillugit Inatsisartut
inatsisaannut nr. 18, 30. oktober 1992-imeersumut allannguutissatut siunnersuummik
saqqummiusseqqullugit Naalakkersuisut peqquneqarnissaannik Inatsisartut aalajangiif-
figisassaattut siunnersuut.**

25. april 2023

UKA2022/77

UPA2023/77

Tamanna tunngavigalugu siunnersuut taamatullu Naalackersuisut allannguutissatut siunnersuutaat itigartinneqassasut aammalu ataatsimiititaliap **allannguutissatut siunnersuutaa** akuerineqassasoq ataatsimiititaliap isumaqatigiittup inassutigaa.

UKA2022/77

UPA2023/77

J.nr.: 01.25.01/2022EM-LABU-00077

J.nr.: 01.25.01/2023FM-LABU-00077

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

Hans Peter Poulsen
Siulittaasoq

Jens Frederik Nielsen
Siulittaasup tullia

Asii Chemnitz Narup

Mariia Simonsen

Kuno Fencker

Lars Poulsen

Jens Napaattoq